

intrepide satisfacere gravi muneri, quod Christus Dominus in Petrum devolvit dicendo: *Simon! Simon! Ecce satanas expetivit vos, ut cribraret sicut triticum, ego autem rogavi pro te, ut non deficiat fides tua, et tu aliquando conversus, confirma fratres tuos.* O ter nos felices! quod militemus Christo sub tanto Pontifice, qui paratus potius animam pro ovibus ponere, quam conniventia vel taciturnitate eas in lubricum ponere, ut circumferantur omni vento doctrinae in nequitia hominum.

Ita denique grato corde Encyclicam Sanctitatis Vestrae, qua ad celebrandam Jubilaei devotionem provocamur, salutamus et omni cum reverentia suscipimus, nec non tempore opportuno, prout communi voto Antistitum provinciae decisum est, devotionem instituemus pro magno populi solatio, cooperabimurque, ut fructus bonos votis Sanctitatis Vestrae respondentes abundanter ferat. Praeprimis divinam majestatem ardentibus exorabimus precibus, ut Sanctitatem Vestram longam adhuc has inter procellas mundum exagitantibus tantopere necessariam clementer ducere vitam concedat, ut filiorum omnium etiam discolorum ad patrem convertat corda, ut per totum, qua late patet orbem terrarum Sanctissime Pater ameris, quem admodum his in oris amaris, et nostrum maximum desiderium est, ut Tibi Sanctissime Pater omnem fidelitatem, obedientiam, addictionem et illimitatum maximae venerationis cultum omni tempore devoveamus.

Tarnoviae die 4. Martii 1865.

Josephus Aloysius Pukalski,

Episcopus Tarnoviensis mpp.

Franc. Seraph. Szłósarczyk,
Praepositus Capituli, Official. et Inful. mpp.

Joan. Bapt. Giełdanowski,
Scholasticus mpp.

Michael Król,
Can. Paroch. Cathedr. mpp.

Joan. Cant. Mika,
Can. grem. mpp.

Stan. Kost. Jakliński,
Can. grem. mpp.

Mart. Leśniak,
Can. grem. et Rector Sem. mpp.

Laurent. Gwiazdoń,
Camer. Papal. Can. hor. Refer. Cons. mpp.

Joan. Figwer,
Cancell. Cons. mpp.

II. Epistolæ responsoria SS. Papæ.

„Pius PP. IX.

Venerabilis Frater, Salutem et Apostolicam Benedictionem. Vehementer delectati sumus Litteris a Te, Venerabilis Frater, atque a Dilectis Filiis istius Cathedralis Tui Templi Canonicis die 4. proximi mensis Martii datis, quas nuper accepimus. Namque ex eisdem Litteris intelleximus, quanta laetitia, et reverentia a Te, et ab ipsis Canonicis fuerit excepta *Encyclica* Nostra Epistola die 8. mensis Decembris superiore anno ad omnes Venerabiles Fratres catholici orbis Sacrorum Antistites scripta, et *Syllabus* Nostro jussu editus.